

terpretæ da l'aotô a sò mòddo, saiva a dî inte 'n mòddo ben ben particolare pe çercâ de strepâ 'na rizata o armêno in sorizo!




Mirco Oriati e Rossana Rizzuto, *Un'idea di mare – Scorci di storia mediterranea dei Liguri in Sicilia*, Società Editrice Sampierdarenese, Genova 2013, pagg. 192

I aotoî, consultoî da Compagna, en maio e mogê: dæto che son un de Zena e l'atra de Palèrmo, e che se veuan tanto ben, an vosciûo aprofondî insemme o studio da stöia de doe çitæ, che an avûo de longo rapòrti surviatutto comerciali, ma no solo, e an misso tutto inte questo libro: e pagine no parieivan tante, ma rendan o dopio perché o scritto o l'è picin e sciasso.

Into pasòu en stæti ciù i zeneixi a anâ in Sicilia: do rèsto, se sa che anavan dapertutto e dove anavan ghe favan 'n'atra Zena. Coscì an fæto a Palèrmo ascì, e defæti gh'è ancon a gexa de San Zòrzo di Zeneixi, co-e tonbe de tante famigge inportanti de Zena che s'ean stabilîe lazù.

O libro o l'è arichîo da interessanti interviste in sce l'argomento, fæte a stòrichi, archivisti e a-o nòstro prescidente Bampi ascì.



Mauro Valerio Pastorino, Lorenzo Torre e Giovanni Traverso, *Il padrone sovversivo*, Sagep Editori, Genova, 2014, pagg. 224

Protagonista o l'è l'Enrico Macciò, industriale de Buzalla, ch'ò l'è mòrto a Mauthausen do 1945 perché o l'ea

antifascista e o l'aiva agiutòu i comunisti. O Comun de Buzalla o gh'è intitolòu a ciassa prinçipâ e òua o ghe dedica questo libro, che inte l'intençion di aotoî o doveva dâ in quadro completo da personna, ma in cangio, dòppo chinz'anni de riçerche, o sciòrte a-o mæximo ma senza avei posciûo fâ pinn-a luxe in sciâ vitta e in sciâ fin de quest'òmmo, perché de maniman en mòrti, primma de poei ese intervistæ, tutti quelli che fòscia saveivan quarcòsa de ciù. Ma anche se no gh'è tutto, inte questo libro gh'è davei tanto, ma tanto, e tutto documentòu, in sce quelli anni tormentæ do nòstro pasòu.



Ferdinando Molteni (a cura di), *Savona in giallo*, De Ferrari, Genova 2014, pagg. 176

A l'è 'n'acugeita de "gialli" de diversci aotoî: Francesco Basso o l'è in giornalista, Maurizio Pupi Bracali o scrive ascì pe-o tiatro, Elena Buttiero e Ferdinando Molteni scrivan e fan muxica insemme, Daniele G. Genova o scrive poèxie e o fa ceramiche ascì, Max Mauceri o l'è in giornalista in penscion, Daniela Piazza a l'è insegnante de liceo e muxicista, Felice Rossello o l'insegna e o l'è stæto aotô pe-a televixon. En tutti ligæ inte quarche mòddo a Sann-a e provinsa, dove an ambientòu e stöie de questo libro, e inte l'introduçion o curatò o spiega perché Sann-a a gh'è avûo a che vedde co-i "gialli" italian fin da l'iniçio.

